

# Sermip erngullu avammut nioqqutissatut atorpeqarnissaat pillugu Inatsisartut inatsisaat (sermip erngullu avammut nioqqutiginiissaannut inatsit)

## Kapitali 1.

### *Atuuffia*

§ 1. Inatsisartut inatsisaatigut sermip erngullu avammut nioqqutissatut atorpeqarnissaat aqunneqarpoq.

*Imm.* 2. Inatsisartut inatsisaat Kalaallit Nunaata imartaanut aamma atuuppoq.

*Imm.* 3. Inatsisartut inatsisaat atuutinngilaq sermip erngullu Kalaallit Nunaanni atorpeqarnissaannut imaluunniit sermimit imermillu isumalluutit erngup nukiliornermut atorpeqarnissaannut kiisalu tamanna siunertaralugu misissuinerit.

§ 2. Sermip erngullu avammut nioqqutissatut atorpeqarnissaat kiisalu tamatumunnga tunngasumik misissuinerit taamaallaat pisinnaapput Inatsisartut inatsisaat manna naapertorlugu malittarisassiakkut pisinnaatitsineq tunngavigalugit.

*Imm.* 2. Naalagaaffik aamma Namminersornerullutik Oqartussat maannamutulli ilisimatusarnikkut atorsinnaasunillu misissuinerit nalinginnaasumik nalunaarsuisinnaatitaapput erngup sermillu pissusiinut tunngasunik.

## Kapitali 2.

### *Misissueqqaarnerit*

§ 3. Naalackersuisut sumiifinni aalajangersimasuni sukumiinerusunik tunngavissaqartitsillutik kismaassinertaqanngitsumik akuersisinnaapput sermip erngullu avammut tuniniarnissaa siunertaralugu misissueqqaarnissanut.

*Imm.* 2. Sivsunerpaamik ukiunut pingasunut akuersissuteqartoqarsinnaavoq.

## Kapitali 3.

### *Atuineq*

§ 4. Naalackersuisut sumiiffimmut aalajangersimasumut tunngatillugu piumasaqaatillu ersarinnerusut tunngavigalugit sermip erngullu avammut nioqqutissatut atorpeqarnissaannut akuersissuteqarsinnaapput. Kismaasisussaatitaanermik akuersissut sumiiffinnut nunamiittunut tunngavoq. Sumiiffinnut immamiittunut kismaatassamik akuersissuteqartoqarsinnaanngilaq immikkut ittunik patsisissaqanngippat.

*Imm.* 2. Sermimut aamma imermut immikkut akuersissuteqartoqarsinnaavoq. Akuersissut atorunnaassaaq,

akuersissummi piffissaliunneqartoq akuersinermiit ukiunik tallimanik sivisunerusinnaangitsoq naatinngu atuinnisaq pilersinneqarsimanngippat.

**§ 5.** § 4 malillugu akuersissutit taamaallaat tunniunneqarsinnaapput piginneqataassuteqarluni imaluunniit aktiaateqarluni ingerlatseqatigiiffinnut Kalaallit Nunaanni angerlarsimaffeqartunut Inatsisartut inatsisaat manna naapertorlugu akuerineqarnermikkut suliaqartunut aammalu ingerlatseqatigiiffinnit allanit ataatsimut akileraaruserneqarneq ajortunit.

*Imm. 2.* Piginnaatitaaffimmik peqartoq suliassamut paasisimasaqarluartuussaaq aningaasatigullu tunngavissaqassalluni atuilluni iluaqutiginninnerup pineqartup ingerlannissaanut.

*Imm. 3.* § 4 malillugu akuersissummik tunniussinermi sumiiffik piginnaatitsissummik pigisaqartup pisariaqartitaanit annertuunerungaartumik angissuseqartoq tunniunneqarsinnaangilaq.

**§ 6.** Naalakkersuisut sumiiffimmi aalajangersimasup iluani piginnaatitaaffilik sumiiffimmi § 4-mi pineqartumiittoq taarsiiviginagu, allanut akuersissut tunniussinnaavaat sermeq imerlu inoqqarfiit pilersorneqarnissaat siunertaralugu.

**§ 7.** § 4 malillugu akuersissut sivisunerpaamik ukiunut 20-nut tunniunneqarsinnaavoq.

*Imm. 2.* Naalakkersuisut piffissarititaq imm. 1-mi taaneqartoq sivitsorsinnaavaat sukumiinerusumik piumasagaatit tunngavigalugit.

#### **Kapitali 4.**

##### *Ingerlatsinissamut tamakkiisumut pilersaarut*

**§ 8.** Atuineq aallartitsinnagu aammalu nioqqutissiuutit tassunga atortussat aqqissuussinerillu allat pilersinneqartinnagit ingerlatsinissamut tamakkiisumut pilersaarut Naalakkersuisunit akuerineqassaaq.

*Imm. 2.* Imm. 1 malillugu pilersaarummi piginnaatitaassummik pigisaqartup uppersassavaa nioqqutissiat pisisussamut tunineqarnerminni qanoq pitsaassuseqassanersut kiisalu suliffeqarfiup qanoq iliorluni nioqqutissat pitsaassusiat qulakkeerniarneraa.

*Imm. 3.* Aammattaq paasissutissat § 11-mi taaneqartut pilersaarummut ilaatinneqassapput.

#### **Kapitali 5.**

##### *Suliffeqarfiup uninnissaanut pilersaarut*

**§ 9.** Ingerlatsinissamut tamakkiisumut pilersaarutip § 8 malillugu akueritinniarlugu qinnuteqaatigineqarneranut atatillugu, piginnaatitaassummik pigisaqartup pilersaarut, suliffeqarfik unippat saliinermut atortullu akuersissut naapertorlugu pilersinneqarsimasut piiarnissaannut qanoq iliortoqassanissaanik takutitsisoq, nassiutissavaa. Atortorisanik, avatangiisit isumannaatsuunissarlu patsisigalugit suliffeqarfiup matoreerneratigut aserfallatsaaliisoqarnissaanik pisariaqartitsisunik, qimatsisoqarnissaa pilersaarutigineqarpat, suliffeqarfiup uninnerani pilersaaruteqassaaq qimatat qanoq iliorluni aserfallatsaaliarneqarnersut.

*Imm. 2.* Suliffeqarfiup uninnissaanut pilersaarut atuineq aallartitsinnagu Naalakkersuisunit akuerineqarsimassaaq, tak. § 8, tassanilu takuneqarsinnaassaaq pilersaarutip piviusunngortinnissaa qanoq iliorluni aningaasatigut qulakkeerneqassanersoq.

*Imm. 3.* Pilersaarut imm. 2-mi taaneqartoq akuttunngitsumik nutarterneqartassaaq nutarterneqartassallunilu suliffeqarfimmi atuisumi annertuunik allannguisoqartillugu. Unitsitsinissamut pilersaarutip allannguutai aamma Naalakkersuisunit akuerineqartassapput.

**§ 10.** Suliffeqarfiup atuisup kingusinnerusukkut aallarteqqinneqartussatut unitsinneqarallarnera aamma Naalakkersuisunit akuerineqartussaavoq, suliffeqarfiup uninnganerani atortorisat aserfallatsaalineqarnissaasa qulakkeerneqarnissaat siunertarlugu, kiisalu unitsitsinermut pilersaarut § 9-mi taaneqartoq kingusinnerusukkut piviusunngortinneqarsinnaassasoq suliffeqarfik aallarteqqinneqassanngikkaluarpat. Ukiut marluk angullugit sivilissusilikkaarumik akuersissut nalunaarutigineqarsinnaavoq.

*Imm. 2.* Taamatut unitsitsigallarneq ukiuni marlunni ingerlasimappat imaluunniit unitsitsigallarnermut piumasaasut eqqortinneqanngippata, Naalakkersuisut piginnaatitaaffimmik piginnittumut peqqussutigisinnaavaat unitsitsinissamut pilersaarut § 9-mi taaneqartoq aallartinneqassasoq.

## **Kapitali 6.**

### *Piumasaqaatit, nakkutillineq, peqqussutit ilisimatitsisussaataitaanerlu*

**§ 11.** § 8 naapertorlugu ingerlanniakkamut ataatsimoortumik pilersaarutip akuersissutigineqarnissaata qinnuteqaatigineranut atatillugu qinnuteqartoq paasissutissanik Naalakkersuisunit pisariaqartutut isigineqartunik tunniussissaaq, matumani ilanngullugit ingerlatseqatigiiffiup aningaasaliisnaassusiata patajaatsuuneranut aammalu imminut akilersinnaassuseqartumik ingerlatsisnaassuseqarneranut paasissutissat aammalu ingerlanniakkap avatangiisinut suliffissaqartitsiniarnermullu tunngasortaasa naliliiviginerat.

**§ 12.** §§ 3-4 malillugit pisinnaatitsinermut kiisalu §§ 8-10 malillugit akuersissuteqarnermut atatillugu tekniikkimut, isumannaatsuunissamut, avatangiisinut, nunamut atorineqartumut, isumalluutitut aamma pitsaassusissamut tunngasunik sukumiinerusunik piumasaqaasiortoqassaaq.

*Imm. 2.* §§ 8-10 malillugit akuersissuteqarnermi piginnaatitaassummik pigisaqartoq piumasaqarfigineqasaaq imm. 1 malillugu pisussaataitaaffimmi naammassinissaasa qulakkeerneqarnissaannut, matumani qularnaveeqqusiissuteqarneq ilanngullugu.

**§ 13.** §§ 3-4 malillugit pisinnaatitsissutini piumasarineqassaaq piginnaatitsissummik pigisaqartoq sumiiffimmi pineqartumi ataavartumik salisassasoq assigisaannillu ingerlatsissasoq.

*Imm. 2.* Piginnaatitsissummik pigisaqartup ingerlatap uninnerani, uninnissamut pilersaarut § 9-mi taaneqartoq naapertorlugu, sumiiffinni pineqartuni salinissamut atortullu akuersissut naapertorlugu ikkussorneqarsimasut piiarnissaannut pisussaaffinut tunngasut § 4 malillugu akuersissummi aalajangersarneqassapput.

*Imm. 3.* § 4 naapertorlugu akuersissummi ilanngullugit aalajangersarneqassapput piumasaqaatit piginnaatissummik pigisaqartup imm. 2 malillugu pisussaaffimminik eqqortitsinissanut qulakkeerinissutaasussat, matumani ilanngullugit tamakkiisumik ilaannakortumilluunniit qularnaveeqqusiissuteqarnissaq pillugu piumasaqaatit.

**§ 14.** §§ 3-4 malillugit pisinnaatitsissummi piumasarineqarsinnaavoq piginnaatitsissummik pigisaqartuunngikkaluartut sumiiffimmi pisinnaatitaaffiusumi sermeq imerlu atorsinnaassagaat namminneq atugassamittut.

**§ 15.** §§ 3-4 malillugit akuersissummi aalajangersarneqassaaq pissutsini qanoq ittuni akuersissut Naalakkersuisunit utertinneqarsinnaanersoq, aamma akuersissutip atorunnaarnerata kingornatigut akuersissummik pigisaqartup pisussaataitaaffii qanoq annertutigisumik atuutissanersut.

**§ 16.** §§ 3-4 malillugit pisinnaatitsissutini piumasarineqarsinnaavoq pisinnaatitsissummi piumasaqaatit eqqortinneqarsimanerat pillugu Naalakkersuisut piginnaatitsissummillu pigisaqartup akornanni

isumaqatigiinngissutit isumaqatigiissitsiniartartunut suliassanngortinneqassasut; taakkua aalajangiinerat suliassiissutigeqqinneqarsinnaangilaq. Isumaqatigiissitsiniartartut sulinerannut, inatsisit suut atorineqassanersut kiisalu inuttalersuinissaq aamma piumasaqaatit aalajangerneqarsinnaavoq.

**§ 17.** Inatsisitigut allanik aalajangersaasoqarsimatinnagu piginnaatitsissummik pigisaqartup Inatsisartut inatsisaat manna malillugu sulinera Naalakkersuisut nakkutigissavaat aammalu Inatsisartut inatsisaata piumasaqaataasalu aammalu Inatsisartut inatsisaat naapertorlugu piumasaqaatit malinneqarnissaat pillugit peqqussuteqarsinnaallutik. Pisortani nakkutilliisuni sulisuusut sukkulluunniit eqqartuussisunit akuersissummik peqanngikkaluarlutik pisariaqarnerali naapertorlugu imminnut ilisaritillutik suliffiup suatungaannulluunniit isersinnaapput, suliassamik sularinissaanut tamanna pisariaqarpat.

*Imm. 2.* Peqqussutit § 13-imi taaneqartut piviusunngortinnissaat piginnaatitsissummik pigisaqartup eqqortinngippagit, Naalakkersuisut taakkua sularitissinnaavaat piginnaatitsissummik pigisaqartumut akiligassanngortillugit akisussaaffigissanngorlugillu.

**§ 18.** Piginnaatitaanermik pigisaqartup Naalakkersuisunut tunniuttussaavai paasissutissat suusulluunniit suliffeqarfiup pisortanit sularineqarnerani pisariaqartinneqartut. Pisortat sularinninnerata naammassineqarnissaa anguniarlugu Naalakkersuisut piginnaatitsissummik pigisaqartoq peqqusinnaavaat paasissutissat pisariaqartitaasut nassiuteqqullugit.

*Imm. 2.* Akuersissummik pigisaqartut suliaasimasut taakkulu inerneru ukiut tamaasa nalunaarutigissavaat, matumani ilanngullugit ingerlatap avatangiisinut sunniutai. Nalunaartarnissamut piumasaqaatit akuersissutini aalajangersarneqartassapput.

## **Kapitali 7.**

### *Pisortat sularinninnerat uppersaasiinerlu*

**§ 19.** Naalakkersuisut aalajangersinnaavaat, suliffeqarfik Inatsisartut inatsisaanni matumani pineqartoq pisortaqaarfimmit aqunneqassasoq inatsisillu matuma iluani aqutsinerup ingerlannissaanut sukumiinerusunik malittarisassiorsinnaallutik.

**§ 20.** §§ 3-4 malillugit pisinnaatitsisutini nalunaaruteqannginnermi kommunit attugaasut oqaaseqartinneqartassapput. Sumiiffinnut kommunit aggugaanerisa avataaniittunut tunngatillugu nunaqqatigiit siunnersuisoqatigiivi pineqartut oqaaseqartinneqartassapput.

**§ 21.** Naalakkersuisut uppersaasiinissaq pillugu malittarisassiorsinnaapput sermip erngullu § 4 naapertorlugu pisinnaatitsissutit malillugit atorineqartut qanoq pitsaassuseqarnissaat nalunaarlugu.

*Imm. 2.* § 4 malillugu pisinnaatitsissutini piumasarineqarsinnaavoq, piginnaatitsissummik pigisaqartup aalajangersakkat imm. 1-imiittut malissagai.

## **Kapitali 8.**

### *Ingerlatseqatigiiffik sermip erngullu atorineqarnerannik avammullu nioqqutigineqarnerannik isumaginnittoq*

**§ 22.** Namminersornerullutik Oqartussat piginnaatitsissummillu pigisartup isumaqatigissutigisinnaavaat ingerlatseqatigiiffik Namminersornerullutik Oqartussat pigisaat ingerlatami akuersissummi pineqartumi peqataassasoq.

*Imm. 2.* Naalakkersuisut aalajangersassavaat imm. 1 naapertorlugu Namminersornerullutik Oqartussat peqataanerat ingerlatseqatigiiffimmit sumit ingerlanneqassanersoq. Naalakkersuisut aalajangersinnaavaat ingerlatseqatigiiffiup sulianik taamaattunik ingerlatsineranut malittarisassat

sukumiinerusut, tamatumani ilanngullugu suliat ingerlatseqatigiiffimmut immikkoortumut inissinneqassanersut.

## **Kapitali 9.**

### *Aalajangersakkat allat*

**§ 23.** §§ 3-4 malillugit pisinnaatitsissutip allamut tunniunneqarnissaa sunaluunniit Naalakkersuisunit akuerineqartassaaq.

*Imm. 2.* §§ 3-4 malillugit pisinnaatitsissut sukkulluunniit akiligassaqarfinnit malersorneqarsinnaanngilaq.

**§ 24.** Piginnaatitsissummik pigisaqartoq taarsiisussaataavoq ajoqusiinernut §§ 3-4 malillugit pisinnaatitsissut atorlugu ingerlatanut tunngasunut nalinginnaasumik taarsiisuteqarnissaaq pillugu malittarisassat malillugit, inatsisit allat atorlugit annerusumik akisussaaffliisoqanngippat.

*Imm. 2.* §§ 3-4 malillugit pisinnaatitsissummi piumasarineqarsinnaavoq, piginnaatitsissummik pigisaqartup taarsiisussaataanera sillimmasiutitigut allatulluunniit qularnaveeqqusiinikkut matuneqartassasoq.

**§ 25.** Naalakkersuisut Inatsisartut inatsisaat manna naapertorlugu ingerlatat pillugit ukiumoortumik saqqummiussamik nalunaaruteqartassapput.

## **Kapitali 10.**

### *Akitsuutit aamma sullissinermut akiliutit*

**§ 26.** § 4 malillugu pisinnaatitsissummi aalajangerneqarsinnaapput piginnaatitsissummik pigisaqartup akileraarutininik akiliuteqartarnissaanut piumasaqaatit. Tamatumunnga ilanngullugu akileraarutininik nioqqutissiornernup annertussusaa naleqassusialu naapertorlugit naatsorsorneqartartussanik akiliisarnissamut piumaqaatinik aalajangersaasoqarsinnaavoq.

**§ 27.** Naalakkersuisut sukumiinerusunik malittarisassiorsinnaapput §§ 3-4 malillugit piginnaatitsissummik pigisaqartut sullissinermut akiliuteqartassasut, tamatumani ilanngullugit pisinnaatitaalernermut, sivitsorneqarneranut, allamut tunniunneqarneranut kiisalu pisortat pisinnaatitsissummik suliaqarnerinut tamanut allanut akiliutit.

*Imm. 2.* Aammattaaq Naalakkersuisut sukumiinerusunik malittarisassiorsinnaapput §§ 3-4 malillugit akuersissummik qinnuteqarnerup nassiunneqarneranut tunngatillugu sullissinermut akiliuteqarnissamik.

*Imm. 3.* Sullissinermut akiliutit imm. 1-2-mi taaneqartut matussutaasussaapput pisortat suliarinninnerannut aammalu akissaajaatit tamakkerlutik ilaannaasaluunniit matuneqarnissaat tunngavigalugu aalajangerneqarsinnaallutik.

## **Kapitali 11.**

### *Arsaarinnissuteqarneq*

**§ 28.** Naalakkersuisut piginnaatitaapput pigisanik aalaakkaasunik arsaarinninnikkut pigisaqalersinnaanermut piginnaatitsissummik pigisaqartut Naalakkersuisullu atorsinnaasaannik inatsit manna malillugu suliffiup pineqartup piviusunngortinnissaanut pisariaqartunik. Arsaarinnissuteqarneq pissaaq pigisanik aalaakkaasunik arsaarinnissuteqartarneq pillugu Inatsisartut inatsisaanni malittarisassat malillugit.

## **Kapitali 12.**

### *Pineqaatissiinerit*

**§ 29.** Akiliisinneqarsinnaavoq Inatsisartut inatsisaanni matumani § 2, imm. 1-imi taaneqartutut piginnaatitsissummik peqarani ingerlatsisoq.

*Imm. 2.* Inatsisit allat atorlugit allanik pineqaatissiisoqartoqarsimanngippat akiliisinneqarsinnaavoq piaaraluni mianersuaalliorujussuarnikkulluunniit

1) paasissutissanik eqqunngitsunik paasissutissiisoq imaluunniit paasissutissanik, Inatsisartut inatsisaat naapertorlugu imaluunniit Inatsisartut inatsisaat malillugu maleruagqusaliarineqartut naapertorlugit pisortanut tunniunneqartussaataasunik, pangiussisoq.

2) § 23-imi aalajangersakkamik unioqqutsitsisoq.

3) § 12, imm. 1, § 13, § 21, imm. 2, imaluunniit § 26 malillugit piumasaasunik sumiginnaasoq.

4) § 10, imm. 2-mi, imaluunniit § 17, imm. 1-imi peqqussutininik malinninngitsoq.

*Imm. 3.* Inatsisartut inatsisaat naapertorlugu maleruagassiani aalajangerneqarsinnaavoq piaaraluni mianersuaalliorujussuarlunuunniit maleruagassianik unioqqutitsineq akiliisitaanermik kinguneqarsinnaasoq.

*Imm. 4.* Unioqqutitsineq imm. 1-3-mi taaneqartoq ingerlatseqatigiiffiup, peqatigiiffiup, suliffeqarfiup imminut pigisup, aningaasaateqarfiup assigisaasaluunniit piliarisimappassuk inatsisitigut inummut naligisitaq akiliisussanngortitaasinnaavoq. Namminersornerullutik Oqartussat, kommuni kommunilluunniit peqatigiiffiat unioqqutitsisuusimappata, taakkua akiliisussanngortitaasinnaapput.

*Imm. 5.* Akiliisitsissutit, Inatsisartut inatsisaat manna tassaniluunniit malittarisassiat malillugit akiligaasut, Nunatta Karsianut nakkartassapput.

### **Kapitali 13.**

#### *Atulersitaanera*

**§ 30.** Inatsisartut inatsisaat atortuulerpoq 1. juli 2001-imiit.

*Imm. 2.* Kalaallit tunisassiaasa avammut tuniniartarnerat pillugu Inatsisartut inatsisaat inatsisartut inatsisaat manna malillugu sermip erngullu avammut tunineqartarnerannut atuutinngilaq.

*Imm. 3.* Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat atuutinngilaq inatsisartut inatsisaat manna malillugu suliat naammassineqarnerannut angusallu pillugit nalunaarusiortarnermut tunngasuni.

### **Kapitali 14.**

#### *Ikaarsaariarnermi aalajangersakkat*

**§ 31.** Sermeq imerlu pillugit atuinissamut avammullu tuniniaanissamut pisinnaatitsissutit, Inatsisartut inatsisaata matuma atortuulernerani tunniunneqartut, piffissami tunniunneqarfimminni atuutissapput.

*Imm. 2.* Ingerlatsinissamut pisinnaatitaanissamik qinnuteqaatit § 2, imm. 1-imi taaneqartut, Inatsisartut inatsisaata matuma atortuulinnginnerani naammassillugit suliarineqanngitsut, Inatsisartut inatsisaat manna malillugu atortuulernerata kingornatigut suliareqqinneqassapput.

*Namminersornerullutik Oqartussat, ulloq 31. maj 2001.*

Jonathan Motzfeldt

/

Søren Hald Møller

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut